

‘Otro Perspectiva’ cu Sra. Zulema Dabian Erasmus, Minister Plenipotenciario di Aruba na Washington

Diplomacia, Economia y Enseñansa Central den Relacion Mericano-Arubano

‘OTRO PERSPECTIVA’ di AWEMainta recientemente a combersa cu Sra. Zulema Dabian-Erasmus, Minister Plenipotenciario di Aruba na Washington D.C. Den un entrevista amplio, cu ayera a wordo publica riba e canal di YouTube di AWEMainta y riba Facebook, e ta comparti su puntonan di bista riba su funcion, e retonan diplomatico y e oportunidadnan cu Merca ta ofrece pa Aruba riba terenonan manera comercio, turismo y enseñansa.

Caminda di carera den direccion di diplomacia

Zulema Dabian-Erasmus a studia Relacionnan Internacional y a haci un stage na Ministerio di Asuntonan Exterior na Den Haag, cu enfoca riba asuntonan economico y relacionnan internacional. Na Aruba, el a ocupa diferente funcion den e aparato gubernamental, incluyendo na Directie Buitenlandse Betrekkingen, Directie Economische Zaken, y como secretario suplente di conseho di ministeronan. Su trayectoria a habri caminda pa su funcion actual como Minister Plenipotenciario di Aruba na Merca.

Un rol diplomatico unico

Contrario na e funcion politico di Minister Plenipotenciario di Aruba na Hulanda, e rol na Washington ta structuralmente hancra den e red diplomatico di Ministerio di Asuntonan Exterior di Hulanda. Debi na e status aparte di Aruba, caminda asuntonan exterior, defensa y nacionalidad ta cay bou di Den Haag, Aruba a scoge pa opera cu su propio representante na Merca — como “wowo y orea” adicional den un estado partner crucial.

E enfoca di su funcion ta riba diplomacia y intercambio di informacion. Di un banda, e ta promove Aruba cerca gobierno Mericano riba temanan manera turismo, seguridad, combatimento di droga y traficacion di hende. Di otro banda, e ta trece desaroyonan na Merca bek pa Aruba, pa asina nan por wordo traduci proactiva-



mente den politica y strategia.

Impacto di cambionan politico na Merca

Zulema Dabian-Erasmus ta menciona e impacto directo di e cambionan politico na Merca, manera e cambio di poder recien di Biden pa Trump. E administracion nobo di Trump ta enfoca fuertemente riba proteccionismo economico y aumento di tarifanan di importacion riba materianan prima manera hero y electronica — desaroyonan cu ta toca Aruba tambe. Actualmente, 60% di importacion di Aruba ta bin di Merca, causando cu aumento di prijs ta wordo sinti directamente riba e isla.

E ta señala ademas cu rednan federal ta cambia bou di gobierno di Trump, cu hopi cambio di personal y incertidumbre. Esaki ta cambia tambe e manera cu Aruba tin acceso na informacion confiabel. Alabes, e ta mira netamente na nivel di estadonan Mericano oportunidadnan nobo pa cooperacion, por ehempel den e sector di cuido, riba tereno di iniciativanan empresarial y intercambionan cultural.

Enseñansa y studiantenan:

Acceso na oportunidadnan pagabel

Un otro tema importante cu a bin dilanti ta acceso na enseñansa pa studiantenan Arubano na Merca. Actualmente, 95 estudiante cu un Arubalening ta studia

na institucionnan Mericano. Dor di cera Memorandums of Understanding (MOU's) cu universidadnan, studiantenan ta ricibi descuentonan substancial riba pago di scol, haciendo e Arubalening di \$22.000 pa aña suficiente pa pago di scol, vivienda y gastonan di bida.

E Minister Plenipotenciario ta enfatisa cu e ambiente di estudio na Merca ta hopi solidario, cu facilidadnan manera tutoring, guia di estudio y facilidadnan di campus sigur. Porcentahenan di exito ta halto — na algun universidad hasta 100%. Su conseho na studiantenan: enfoca riba cifranan halto, sea activo den trabou boluntario y actividadnan extracurricular y orienta bo mes bon riba informacion y oportunidadnan disponibel.

Pa termina

E rol di Sra. Dabian-Erasmus na Washington D.C. ta demostra con importante diplomacia activo y cooperacion strategico ta pa futuro di Aruba. Dor di ta presente unda cu decisionnan ta wordo tuma y mantene relacionnan na tanto nivel federal como local, Aruba ta fortalece su posicion den e contexto Mericano-Caribense.

Wak e entrevista completo cu Sra. Zulema Dabian-Erasmus den e programa ‘Otro Perspectiva’ riba e canal di YouTube di AWEMainta: <https://www.youtube.com/watch?v=qhYeAgL3eXU>